

四庫全書

集部

欽定四庫全書

元豐類藁卷二十一

宋 曾鞏 撰

制誥

左僕射門下侍郎王珪追封三代并妻制

曾祖永贈開府儀同三司

勅禮取其稱故位益尊則事其先者世益遠今予良弼
褒命其親得上至于三世求之於禮豈非取其稱哉具

官某曾祖某仁篤慈祥畜德甚盛蓋其為積也厚則其流澤也廣故能開相厥裔為時宗臣百辟是師王室是輔推功原大肇基自爾顯揚宗寵茲惟舊章是用進爾之階秩在第一尚其不昧服此茂恩可

曾祖母尹氏追封燕國太夫人

勅優禮大臣厚其寵數所以勸在位之功德而共成天下之治也宰相之任重矣尊榮光大上施于其三世豈不即乎人情而稱其位序哉具官某曾祖母某氏幽閒靜專躬

蹈純德嬪於盛族壹契是稱啓佑後人任國幾政流澤所自
宜極褒崇追命定封列于大國光靈不泯尚服朕恩可

祖贄追封魏國公

勅天下之忠乎上教有所自故上之仁乎下恩有所延
其體相成治道所出惟吾股肱之佐共任天下之重愍
書寵秩施其祖廟所以慰其顯親之心稱其事君之義
具官某明允純篤德業惟茂義訓不倦彌遠益彰維時
聞孫寶輔予治念功原始宜極褒嘉庸建爾于上公俾

受國于全魏歿而尚有知也其服朕之厚恩

祖母立氏追封魏國太夫人

勅夫其先之畜德也厚則其裔之蒙澤也長故寵祿在其子孫則褒榮施其祖禰獎功錄善必揆所繇所以勸天下之成其家也具官某祖母某氏身蹈純行嬪於令人教行閨門自隱而顯惟予哲輔實爾慈孫質厥所元宜有加命一作嘉全魏大國從夫之尊服此寵章尚綏爾後可

父準追封漢國公

勅朕敷求哲人以共大政隆名寵祿既俾集于厥躬褒
大推崇則又施其櫛廟所以遂吾大臣欲顯其親之志
而開示在位予一人尊獎近輔之心具官某父某材通
世用行蹈天常德畜不施澤流及遠惟時有子為國宗
臣叅聽萬幾人望惟允慶所自出朕惟汝嘉屏蔽四方
漢為最大受茲封土承裕爾家可

母薛氏追封漢國太夫人

勅位有貴賤升降之等故禮有隆殺損益之差今輔子
聽斷萬幾之臣在師長百官之任蓋列於廊廟名秩既
殊故追榮其親命數亦異茲惟故事其可易哉具官某
母某氏婦道以順母儀以慈言為壺彛動應圖法能教
其子為時宗工股肱朕躬王室是賴褒崇之典既啓名
域漢為大邦改進封號尚宜寵渥永祚厥家可

妻鄭氏追封楚國夫人

勅詩人之義君之夫人有委蛇之行河山之德然後在

尊位備盛服從其夫榮可以為稱施於世教所以始人
倫而出治道也具官某妻某氏淑茂柔明生于今族動
靜以禮協於經言相予宗臣慎其內行曾不偕老永綏
厥家湯沐之田既受方國有加追寵宜易新封尚其光
靈服我休命可

中大夫尚書左丞蒲宗孟追封三代并進封妻制
曾祖穎士贈太子少保

勅朕稽于古以正百官惟尚書政本而左轄綱紀之司

延登哲人俾祇厥叙愍有加寵逮其重祖所以隆崇大
臣國之典也具官某曾祖某潛德西南在約彌勵流光
錫祚集其後昆總典中臺實輔予治東朝二品是用命
爾尚維幽漠服此茂恩可

曾祖母鮮于氏追封大寧郡太夫人

勅宗廟之數諸侯以五蓋任彌重者禮彌盛貴賤之節
然也今吾大臣追命及其三世與夫朝制豈異意哉具
官某曾祖母某氏作德於內以宜厥家啓相後人預蔽

國論按圖考地俾定爾封其尚有知服茲寵號可

祖伸贈太子少傅

勅人本乎祖故吾加恩近輔褒榮其先至於累世豈不
緣人之情而制為命數哉具官某祖某內含純明外蹈
規矩流澤也遠有孫而賢進於中臺總國綱轄善有所
自朕惟汝嘉東朝之孤傳位為寵用賁幽宅尚其欽承
可

祖母陳氏追封蜀郡太夫人

勅世德之積者久則發於其後者長故朕隆崇近輔而褒榮其先非一二世而止所以勸天下之善豈非博哉具官某祖母某氏淑慎恭儉化行閨門啟其元孫持國網要蜀惟爾土以定新封尚其如存膺此茂渥可

繼祖母朱氏封閬中郡太夫人

勅夫位以德升禮以位叙不失其稱茲為義榮今五臺進大臣而圖其先烈內外命秩亦惟其宜所以使上下之間公論惟允具官某繼祖母某氏婉孌冲靜行孚於

家祚爾之孫興以輔朕西南上郡愍有褒封垂聲贊書
尚其不殁可

父師道贈太子少師

勅吾之大臣繇聰明材諳以有爵祿之榮子有命書愍
贈賁其考廟所以稱其顯親之心慰其霜露之感位不
次授厥惟故常具官某父某忠篤純明德履惟茂壯謀
循政聲列在人積厚慶隆及子而顯時子左轄司國紀
綱惟流有原開跡自爾宮師之貳名寵秩尊以告幽局

尚其祇服可

母陳氏追封潁川郡太夫人

勅人子之於其父母莫不有顯揚褒大之心惟任重秩
尊得盡其志此隆名寵祿所以勸天下也具官某母某
氏經德履善宜其家室錫羨流祉在爾後人時予宗工
任國綱轄陪京望郡俾定新封服我命書尚其不泯可
妻陳氏封河東郡夫人

勅朕援用天下之材以為共政之臣就位之初恩數禮

秩所以尊榮光大之者上施其祖禰而旁及於閨門蓋
任屬之者重則褒隆之者其可以不異哉具官某妻某
氏言容功德柔閒懿恭嬪于令人休有華問惟時哲輔
進秉國成相助之勤爾效彌顯改擇加郡登崇號名尚
宜厥家永綏寵祿可

陸佃兼侍講蔡卞兼崇政殿說書制

勅朕於書無所不學於天下之事無所不考而不敢自
以為足故設置講解之官使以先王之六藝日陳于前

朕於求多聞以建事之心可謂勤矣具官某好古知經
宜在此位夫尊其所聞以懋厥職茲為爾守其尚起哉

可

蔡卞改講
解作誦說

徐禧給事中制

勅有殿內之臣職在於平奏述詳命令糾其違者而止
之覆其是者而行之至於決獄官人條陳法式之事莫
不當考察焉其任可謂重矣具官某以材進拔興執邦
憲茲用推擇俾踐厥位惟精敏不懈可以周閱讀惟忠

實不撓可以司論較朕方觀爾之效爾尚慎於厥修可

鍾浚將作少監制

勅具官某繕脩興造程工督作之任不可不屬之其人
位視九卿禮秩甚寵正名之始考擇惟慎爾以材選往
貳厥官尚其祗承以允收拔可

蔡燁河東運判制

勅具官某分部而使雖以將漕為名然實在於總庶務
之予奪察羣吏之能否參予任屬選授其艱以爾為能

俾承厥序夫均通貨食使物有羨羸審覈幽明使人知
勸畏茲為爾守其往懋哉可

供備庫副使董琰等十一人轉官制

勅具官某等西南之蠻恃阻且遠跳踉溪谷負誼干誅
王師鼓行舉其巢穴斬獲摧陷爾預奏功第賞有差焉
惟祗服可

待制王堯臣知單州制

勅提將之符顯制一道使紀律明於士衆忠實紀於朝

廷然後為國藩垣能稱其位具官某統治晉陽宜知其
任而西伐之卒比有逋亡繼形奏陳皆以疾告無直繩
肅下之誼有浮言罔上之迹雖付之刺督考驗甚明而
既更詔恩法當貸爾俾仍近職往守偏州尚自省循茲
為薄責可

鄧忠臣母周氏封縣太君制

勅具官某母某氏爾子忠臣有勞應賞願更寵典以啓
爾封俾錫命書茲為異數尚惟祇服以稱茂恩可

杜常兵部郎中制

勅具官某朕為保伍之法寓戰陣之教欲使兵與農合
庶幾先王之迹夏官之屬實參典領以材擢爾往祇厥
序夫能獎誘服田之人悅趨講武之政馴致有漸而彌
綸不疏惟無廢爾之勤可以承朕之志可

李士京韓宗文大理寺主簿制

勅具官李士京等察治犴獄之官勾稽簿領之事往祇
選用無懈厥脩可

許懋兩浙運副制

勅具官某朕擇遣使者分部而治雖以將漕為稱然實
總民政之舉措察吏屬之能否蓋連數十城之地舉而
屬之其選豈不重哉爾詳練敏明宜服子采蓋爾之職
非止於督賦歛斷獄訟而已惟除苛熄擾可以使民遂
其宜惟務實去華可以使吏馴其行宣恩德而美風俗
待爾能善其官可不勉歟以祇朕命可

內殿承制段綽等知州制

勅具官某州有兵民之寄而地在疆場之間則常擇用材武之臣屬之守禦之任爾以能選往祗厥服尚思綏靖以稱簡求可

宗室承操新婦王氏進封國夫人制

勅親愛之而欲其貴富朕於公族皆推是心寵數徽章施於閨壺茲惟故事朕敢忘哉具官某新婦某氏作合宗藩躬有馴德啓茲全國用進爾封以致朕尊獎近屬之恩尚懋爾服承休顯之稱可

宗室克懼復官制

勅具官某屬在近親享有榮祿以愆坐法亦既再期稽
於故常宜服位等勉思祇飭稱此茂恩可

李德明遙郡團練使制

勅具官某擢甲執兵人之重任賞信而速所以勸功爾
忠力武材稱于種落往殲醜類屢以捷聞圖爾之勞進
位二等益思奮勵以待異恩可

陳景等尚書省主事令史制

勅其中臺政本主曹事治文書亦不可不屬之其人爾
往懋哉皆仍舊秩可

折克行彭保轉官制

勅具官某朕惟羌之猖狂內相賊虐致天之罰爰命六
師開通道塗收復城聚摧堅獲醜爾功居多蓋夫軍賞
之行速則衆勸是用進爾之秩以激士之心尚有不次
之恩以待非常之效可

程嗣恭祖無頗程博文開封府推官制

勅具官某開封天下之聚俗雜五方之民蓋巧偽繁興
獄訟滋出贊治之任考擇維艱以爾為能俾祗厥服夫
慈惠足以煦養惇弱剛嚴足以帖伏奸強然導民之方
尚有可識使風俗有以粹美而四方有以觀則往助爾
長其尚懋哉可

李憲武勝軍節度觀察留後制

勅王師西出土大夫皆奮力行陣有尺寸之功者朕無
不錄况議勞數實有大於此者其於信賞朕敢忘哉具

官某比自臨洮率衆躬將摧殪醜虜恢復故疆鼓行羗中屢以捷告故按閱朕用寵嘉秘殿榮名便藩留務兼是茂渥以獎爾庸其往茂哉益思來効可

李靖臣王存趙彥若曾肇轉官制

勅惟朕祖考成功盛德覆被天下固非文字可得而名然史記冊書國家之典上以紀先帝言動之迹下以及羣臣善惡之實傳之萬世宜有論次具官某以文學選用真誠信實朕惟汝嘉是用褒進尚其祗服以稱朕

恩

李舜舉等轉官制

勅具官某朕惟先帝功德之殊宜見之方冊故詔擇儒臣屬之論譔而爾於其官次與有祇事之勤亦既書成例當褒錄進升位等其尚欽承可

皇伯滕王第十六女封縣主制

勅具官某第十六女親在近屬生而懿柔宜開縣甸之封以榮湯沐之號予惟惇序爾尚欽承可

元豐類藁卷二十一

欽定四庫全書

元豐類藁卷二十二

宋 曾鞏 撰

制誥

吳居厚京東轉運副使呂孝廉轉運判官制

勅具官某朕進拔能吏以督視一路蓋州縣政令之舉
措公私貨食之歛散莫不任焉得人之難考擇惟慎以
爾幹敏閱試惟舊用是分茲東部屬以使事夫施於民

者厚而刑罰請求於民者約而財用贍使德流澤通而風化輯穆以稱朕憂憫元元而勵精庶務之意爾其勉矣往服訓辭可

西頭供奉官武遂等轉官制

勅具官某王師西出以討不庭爾能殲擊克殘恢復州聚錄功增位不以次遷勉服朕恩益思奮勵可

曲珍四廂都指揮使絳州防禦使制

勅具官某羌之獸心內相危害王師薄伐蓋將天威爾

能躬將士徒摧堅殪敵斬捕甚衆鼓行無前周衛典軍之官名城禦侮之寄兼是寵數以疇爾庸尚有異恩待爾來效可

文思使張俊等遷官制

勅具官某朕爰命六師奉辭西伐爾能効其忠勇深入羌中獲醜摧堅以捷來上躡陞位等以懋爾勞其能繼於前功朕豈稽於信賞可

文及甫吏部員外郎制

勅具官某朕正百工之名而將責其實効其官吏考擇尤慎天官之屬僉曰汝能其往欽哉無忘勉勵可

許安世都官員外郎制

勅具官某徒隸傭役之人典其廢置而時其遷序主以郎吏其選甚高爾蚤以敏明升華儒館宜增階等往涖厥職尚思勉懋以稱簡求可

皇伯宗諤贈太尉韓王制

勅王者之於天屬覆之以光榮而恤其死喪之戚所以

本人倫敦天下也具官某以德則循理小心始終無悔
以功則受命仁祖趣定儲極以位則渠門赤舄任兼相
將以爵則躡於五等列為真王以親則先帝之從父兄
而余曰伯父顯名美實福祿之全可謂盛矣奄遘癘疾
至於不起余聞震悼臨奠致哀再不御朝以伸情禮是
用追加書贊進秩上公啓此大邦隆崇號稱余於親親
之恩可謂備矣尚惟不昧服此寵章可

齊宗壽三班借職制

勅某有司言爾滿歲當遷而獎進爾勞又當躡等是用
加茲寵渥列於命秩往惟祇服以稱甄收可

交州進奉使副梁用律洛苑副使阮陪太常博
士制

勅具官某策名蕃服納貢王庭將事之勤朕用甄錄進
其位等茲惟舊章往稱茂恩毋忘祇恪可

皇伯宗惠新婦郭氏進封郡夫人制

勅具官某新婦某氏司宗於屬為近於位為重王於爵

為貴蓋禮秩之見於外者既寵則施於內者宜殊爾德
性淑均稱其家室爰加象服之盛以大鵲巢之榮其尚
欽承茲為異數可

賈昌衡知鄧州制

勅記舊俗者稱南陽之民夸奢上氣力難制御今其餘
習殆尚有存者故有邦之任朕不輕以屬人具官某中
外踐更令聞惟舊茲用考擇往分彼土蓋穰清之間雖
俗雜難治然教民敦本興於好善召信臣杜詩之遺跡

在焉使農桑勸而風俗厚爾尚思繼於前人其往懋哉
無替朕命可

李良輔知廬州張垺陝州崔度蔡州王說徐州制
勅具官某朕董正治官自朝廷始至於六服羣吏莫不
考循其名以督課其實夫宣恩德以逮下厚風俗以承
上其選為重者非長民之任乎爾惟其人屬以茲位蓋
奉職遵禮以有循良之稱苟能自勉則寵勞錄最以明
國家之典朕敢忘哉往欽厥司方稽爾效可

知泉州陳偁梓州吳幾復湖州唐淑問並任制
勅具官某吏之奉職循理能附其民使之久於其官則
上下相安而治化易洽今爾之材宜於既試俾仍舊服
以懋厥庸尚體朕恩益思遠効可

吳安特太僕少卿制

勅具官某車府廐馬牧監之政典以卿士其選甚高念
非得人曷贊其治爾材質明茂嘗更器使以憂去位既
終喪紀宜更階等往貳厥官其勤夙宵以敏功實可

菊曩二右班殿直制

勅具官某夷獠背恩賊殺命吏爾能擊刺醜類獻其首
級宜陞位序以獎爾勞尚勵壯圖益思來効可

馮正符借職制

勅某西南夷背德獸心敢闕邊隙爾能通宣兩誼協助
軍謀宜進官榮屬之守護勉思奮勵無替前功可

奉議郎景思誼授東上閣門使廊延第一副將制

勅具官某西討之兵有陳戰之功者朕無不錄爾能致

其材武奮擊黠羌克敵摧鋒屢以捷報疇庸較實宜有
異恩介上閣之使名貳連營之將領茲為獎拔蓋非常
科尚勵壯謀益思來効可

皇太后親姪高公繪通州刺史高公紀達州刺史制
勅具官某等朕有顯親之心欲形於天下故加恩母黨
所以本人情隆世教也爾等皆於外家實在近屬持身
恭慎朕所識察刺臨州郡典視祠宮秩寵地優並膺拔
用尚勵爾欽承之志以稱余廣愛之仁可

梅福封壽春真人制

勅某在漢之際數以孤遠極言天下之事其志壯哉晚而家居讀書養性卒遺俗高蹈世傳為仙今大江之西實存廟像禱祠輒應能澤吾民有司上聞是用錫茲顯號光靈不泯其服朕恩可

卓順之直翰林醫官局等制

勅某稽其醫事而制其食先王之興也屬以愛主之疾爾能調治有瘳是用寵以官榮進其服品往遵厥職無

替恪恭可

成卓閣門祇候制

勅具官某長川廣谷之間與蠻夷壤接爾處徼巡之任
能練達人情輯寧疆候守邊之臣稱爾之材謂難代易
是用進爾職於上閣而俾恭其舊服朕於念勞獎善之
心可謂至矣其思綏靖以稱朕恩可

溪氊本族副都軍主等制

勅某守邊之臣屬爾奉其方物來獻闕庭朕惟爾嘉是

用命爾還其種落典治一軍往勵忠勤益思來効可

景青宜黨令支團練使阿星刺史制

勅某爾有摧鋒克敵之功而又奉其方貢來見闕廷寔
勇且忠法當甄進兵團之任以寵爾勞往其祇服益思
來効可

論檀巴柯族軍主結廝雞柯族副軍主制

勅某爾父有嚮慕中國之心歿而不遂其志屬爾予朕
願備一官朕甚憐之是用加命爾秩往其祇服益勵忠

勤可

阿憐官捉廝雞並本族副軍主制

勅某爾父效貢來庭因得進見以爾為請願備一官朕

嘉其尊嚮中國之勤是用錫爾命秩往思忠恪以稱朕

恩可

內一段作爾父因其種人入脩貢職以爾為請

溫曷知欽州制

勅某州有兵民之寄而地在疆場之間則常擇用材武之臣屬之守禦之任爾以能進往祇厥服尚思綏靖以

稱簡求可

劉安等中書省主事令史制

勅具官某等右省詔命之所出也吏治文書非習法令
熟成事不能稱其任爾等皆以命秩往祇乃服無忘恭
恪以慎厥司可

知潁昌府韓維再任制

勅朕待天下之士未嘗不篤於恩況於故舊之臣朕所
加厚則於順遂其意夫何愛哉具官某昔在宮朝事朕

左右今列職秘殿位寵且親而便其故鄉屬以州任雖
歲既再滿然重奪其志是用仍其舊服俾祇厥官以致
朕求舊之仁尚勵爾在公之義可

米贊等轉官制

勅具官某爾以衆西出討擊羌虜斬獲首級有司以聞
是用甄錄爾功躡陞位等往其勉矣益勵壯圖可

雍王顥乳母宋氏贈郡君制

勅某氏惟雍王顥於國屬之親且愛而爾有乳養之勤

故其生也錫之爵邑其歿也飭以恩榮是用追命爾封
進於列郡以光幽宥尚服寵章可

豐稷吏部員外郎制

勅具官某尚書正本而吏部天官所以綜叙羣材以成
天下之治郎於典領其選甚高是用擢爾之能俾叅厥
服朕方勵精政理而務在得人爾惟懋於其官庶幾承
朕之志可

呂和卿考功員外郎制

勅具官某計羣吏之治而明黜陟之法臺郎典領列於左曹拔用爾能俾叅厥位夫能善於其職固將圖爾之勞可

韓晉卿莫君陳刑部郎中制

勅具官某刑者所以助治而聖人之所尤慎中臺叅綜郎選甚高爾曉達吏方宜在茲任夫惟篤於明恕乃以副朕欽恤之心其往懋哉以祇厥叙可

范諤知密州范子諒濮州劉士彥泗州制

勅具官某守土之官民事所屬朕方勵精庶政之日尤
務在於得人考擇於朝爾往惟允夫能宣布恩德以拊
循吾民而綱理風俗則為能稱其任爾其可不勉歟

東端翰林醫官制

勅某爾父易簡以醫入侍處劑湯液有勞可旌進遷爾
官用申獎寵往惟祗恪以稱朕恩可

沈士安西綾錦副使制

勅具官某明習禁方以醫入侍處劑湯液有勞可旌進

貳使名以申獎寵往承厥叙無替爾勤可

王暎楊宗三班借職制

勅某爾等備吏屬治文書勤亦久矣是用從爾之請錫之命秩往惟祇飭以稱朕恩可

王從伾知岢嵐軍制

勅具官某崇築壘培本以輯治軍旅及四方既平而假守之臣實任民事列於有土之官矧嵐谷並邊寄屬尤慎爾以選擇往祇朕命夫能開示恩威以惠養吾人而

懷撫異俗則為善於其職尚思爾守無替訓辭可

呂升卿館閣校勘通判鄆州制

勅具官某鄆有提封之廣生齒之衆於東為極郡贊貳
政理選授惟艱爾蚤以藝文列於辭館宜更階品往承
厥叙無忘祇慎以服朕恩可

陳康民管勾永興等路常平張太寧提舉秦鳳
等路常平制

勅具官某等朕為保伍之法寓耕戰之政典農之官屬

以兼領蓋分路而治隄制或難固當從宜使之易地是用命爾換部而使夫能利力田之民脩講武之令務在各奮爾庸不失其職則為能體朕意其尚懋哉往遵迺服可

詹中行知無為軍制

御史有言責之臣朕之所取信也言而欲遂其忿鬪之私乃至於失是非之當豈獨朕於取信失其所屬蓋汝之以言為職誼豈當然俾去憲臺兼榮職秩往臨軍壁

宜體朕心

駙馬都尉王師約轉觀察使制

朕於嫺戚之臣未嘗不篤於恩意然其積勤累善不罹
罪悔而七歲一遷其官則必循用舊章蓋爵賞者天下
之至公朕不敢以私撓法也具官某出于景族選上貴
主有淑慎之行無怠肆之失第其閥閱宜得叙陞廉按
一州以為爾寵蓋爾自初仕迄此再增厥位皆以歲滿
應於遷格則朕之謹于信賞爾之安其常守上下之際

豈不兩義俱得哉無忘勉勵以永保於榮名可

崔象先等帶御器械制

勅具官某乘輿所在供御之物無一不備具者故鎧甲
弓矢屬之以從者亦不去於側非左右親信惡足以任
此哉爾給事惟舊宜就茲列益思祇恪以稱厥官

蔡京起居郎制

勅具官某王者言動必書豈獨思為後嗣法哉施之於
已固欲擇語默慎行止也執簡肆筆必也屬之其人爾

之第卞既已列於右史今復不次用爾使記予事位於左省士之在此選者希矣而爾之叔季並直同升其於榮遇世罕及者朕恩若此則汝之自効宜如何哉其懋厥脩以報所受可

王中正种諤降官制

朕大興士衆屬汝等以伐羌固將舉其巢穴非徒卻虜收並塞之地而已兵西出則近而爾等東繇綏德回遠之路以疲士馬費芻粟致功用不集中正議既不審又


約有分地當攻其左而不能奮擊以殲除醜類夫軍賞
吾必信而罰亦安得已哉是用按爾之罪降秩有差其
體寬恩尚思報稱可

封曹諭母制

曹氏國之外屬而諭實爾之出諭既有列於朝亦有追
榮及爾是以封之列郡秩以寵名茲為異恩以光幽窆
張知均州制

嶺之西南桂為劇部外有溪居海聚之民壤錯內屬拊

巡鎮守詎可屬非其人爾比選于朝往備茲任而內不能統齊士吏外不能綏靖華夷致茲繹騷自干邦憲奪其美職處爾偏州茲惟朕恩無忘思省可



元豐類藁卷二十二

欽定四庫全書

集部

元豐類藁卷二十三至
五

詳校官庶吉士臣張溥

檢討臣何思鈞覆勘

總校官降調編修臣倉聖脉

校對官中書臣陸湘

謄錄監生臣王志遠

欽定四庫全書

元豐類藁卷二十三

宋曾鞏撰

制誥擬詞

冊立皇太子制

惟宋祖宗集大命開蹟垂統傳繼在予賴天之靈海內
和洽獲薦珪幣以為祭主惟先哲王享國君民必有儲
兩以相承翼所以奉天地嚴宗廟與民為依長慮萬世

也厥惟故典予敢不率咨爾某生材之卓絕倫拔類羣
訐岐嶷成於自然緝熙光明不繇外獎潛德日茂敷聞
下土將旌王組藩衛京師神祇所毗戎夏係屬宜執七
鬯位以時定今遣某某立爾為某夫天下之本在太子
太子之所務求諸已而已爾能明其心人不詔其孚爾
能善其身人不戒其隨治亦多術矣要不易乎此也嗚
呼匪得之難充之為難爾能服于訓辭以承我先后之
流澤俾爾躬無疆惟休惟予及萬邦亦無疆惟慶豈不

題

王制一

昔大漢之興鑒孤秦之敝分土而開者九國當高祖之初同日而立者三王在孝武之世或支庶之疎屬或宗嫡之近親所以蕃輔京師承衛天子今朕按圖規地諏日定封推天性之厚恩本人倫之通誼以隆公室蓋率舊章景鍾氣至靈生材特異聰明先物不自於鐫磨孝愛絕人非繇於獎勵比服公主之寵仍分將鉞之宗休

有顯聞洽於時論是用疇其爵邑列以真王建爾國家
保茲東夏視祲威於宰席增衍食於爰田用強磐石之
基實重維城之勢嗚呼冊之宗廟申戒因其土風式是
大邦親臨定其名號爾尚無作匪德以追配前人之休
無從匪彝以答揚皇祖之訓俾人預懷榮之慶而身兼
燕譽之祥王其勉之朕命惟允

王制二

昔周建親戚蓋五十三國以蕃輔京師漢封骨肉或連

數十城以承衛天子所以強形勢固根本計慮深矣朕
甚慕焉矧先帝之子朕之仲弟宜膺顯冊進啓大邦茲
惟典常夫豈敢廢某淵靜冲約孝友忠篤不挾其貴以
從匪彛不恃朕恩以作匪德奉法遵職夙夜小心王于
雍邦滋久彌卽惟營丘之野臨淄之中太師呂尚之所
建國兼岱及海天下重地是用立爾保茲東土三公之
儀上將之節爰田真食備物寵章大告于廷咸以屬爾
於戲書稱帝堯之德曰以親九族詩美文王之聖曰刑

于兄弟蓋教自上行愛繇親始先王之道不易之理也
今予命爾不違茲誼尚悉爾心其勵相朕使黎民百姓
於變時雍繇家及國罔不作孚以屏予一人鎮拊方夏
實諉在王時其勉之

王制三

天子支子若其母弟姬姓於周未有不侯劉氏於漢未
有不王蓋親之欲寵其位愛之欲厚其財先王之法入
事之理也某先帝少子朕之季弟聰明齊敏孝弟忠實

富而能約不縱以敗禮貴而能戒不恣以好逸畜學樂
善厥德日新王曹積年遵職無懈惟斗牛之野太伯所
開三江五湖其陽大海鹽魚金穀天地之藏茲用命爾
式是南郊儀視三公任兼上將真封衍食備致寵章於
戲昔魯公於周大啓爾宇以輔王室康叔於衛實為孟
侯以保乂民今朕順稽于古以屬爾某爾尚念茲以祇
厥服常棣之澤配前聞人維城之休承我高后在爾勉
矣往其欽哉

皇子制

朕受天命撫萬邦實承祖宗之盛德丕烈永惟先王之
典人君在位必蚤建太子所以重宗廟為天下萬世計
也某粵初在母祥應先見誕始能言則岐則嶷王封將
位蕃輔京邑孝愛日裕溫恭自然神靈所開人望攸屬
考刺六藝主器以長生民之道不易之理也其立為某
於戲非朕私於子某惟宋高后之傳序垂統朕不敢忽
惟四方上下之所注心朕不敢距嘉與海內同孚于休

播告遐邇其諭朕意

贈第八皇子制

朕惟父子之親人道之極蓋父有天下而隆名重位建
於其子此恩義之所始而先王之制不易之理也至於
禮命未及奄遘淪亡申以哀榮朕何敢廢皇第八子某
秀拔慧悟天質異甚不好戲豫安於靖恭謂及大成必
為國器蕃輔王室朕有望焉而屬疾久之醫禱備至不
幸天閼痛何可堪其於陳迹尚存音容如接永言傷悼

莫愬朕懷今有司上聞揆于公議謂宜秩以三事今于中臺爵之真王諡以佳號厥惟舊典朕豈能抑是用追錫備茲異數嗚呼生而有特出之姿不得遂其美歿而有非常之寵所以厚其終服我命書尚其不昧

王子制

朕隆於親親非特私恩而已所以教天下厚人倫也爾家慶所鍾王室之出列於使領茲惟異寵往思報稱待爾成人

韓琦制

躬闕廟之材體純一之德翊亮三后格於皇天惟初登
庸合志皇祖仁民愛物日陳上前進賢退奸陰利天下
側陋幽隱靖譖庸回削滅無類及受末命戡濟艱難以
已徇時坐定大議天望人事脗無間然市朝不驚按堵
如素海內萬里外薄四夷率職駿奔無敢先後昔三代
遭變繼世之初干戈警備陳及門廷書之史官以為後
法以至兩漢嗣位則又閉城屯兵以為故事未有兵藏

於庫士散於家而傳序繼統中外晏然如今日之成也是繇列聖功德無窮之休亦惟廊廟之上遠畧大度身任社稷克濟登茲者也

相制一

天有保命集于朕躬惟用乂民罔以自逸敷求良弼作為憑依若園就規若正識墨今朕得士諗于在廷某廣博靜淵密於世用推其計畫見於可行考其事功效於已試爾為爾守宜立輔朕茲用詔爾位于東臺嗚呼自

周衰以來千有餘歲先王之道蔽而不明振壞扶微朕
竊有志尚懋朕佐圖惟設施參諸經訓而不違質諸時
宜而不謬無崇小慧以易大猷無伐己能以距衆善惟
賞刑在上不可以僭惟聰明在下不可以拂俾厥后克
濟其任則爾身永孚于休其往起哉以承我祖宗之不
烈

相制二

有為之君舉賢以自助有志之士遇主而後伸兩常相

須而相濟者少兩常相求而相值者寡朕觀前代君臣
之際聖賢相與之盛慨然忻慕願比迹焉今得其人詔
于爾衆某行無緇磷學有本原材諳智謀淑問惟舊納
忠左右匪懈夙宵蔽自朕心命爾予翼列予右相進貳
西臺嗚呼自道術不明而世蔽滋久法度多缺而紀綱
浸微圖治者以古為迂錯事者以苟為得兵安於坐食
而不合於農士習於空言而不知為吏禮義廉恥闕而
不思朋黨比周靡然成俗任之以學數而敗官以墨者

方興起之以赴功而便文自營者滋出伊欲黜漢唐之
淺陋追堯舜之高明尚懋相予予忱不貳使千載之隆
振於一朝上下之間配于前烈以揚我先后之光訓亦
續爾舊服之顯庸

相制三

朕飭正三省綱理萬事號令所出本諸西臺閱審駁論
屬之黃闥推而達之則在會府以其官之長貳皆為任
政之臣鼎足居中各遵其職分守則異合謀惟一時予

俊又宜就茲列某身篤學行自幽而顯宣力中外績用
彌劭惟文昌政本揆叙百度介于左省考慎朕命圖濟
厥服爾其往哉朕訓迪治官順稽于古使其體至大而
統之有要其事至衆而舉之有條不惟其文惟其實不
惟其位惟其人爾允念茲以勤予翼蓋先代之法存於
籍者既殘缺而難循當今之宜殊於昔者又舛違而易
遠酌是彝憲成之甚艱尚迪庶工奉若惟新之則亦永
來世預有無窮之聞

節相制

古者出軍之法始於一井之間遣將之常甫在六官之內師田共務文武同方蓋丁發召之期則士就戎行而卿行於外已征誅之事則衆遵農畔而帥旋於朝歷世雖殊茲致惟一逮後王之更造開阡陌以居民隸伍符者身不受於一塵仗齊鉞者位不連於九棘其於荷戈抗隊為王之爪牙立纛設旄為國之屏翰上下之任古今則同予得異能詔于在列某性資強毅識慮精通束

髮修身有恕已及人之志歷官行事有承流宣化之勤
踐揚要極之司更閱歲時之久嘉謀讜論簡在朕心廣
譽善聲洽於輿論有國之典以爵詔功宜疇厥庸爰啓
爾宇建大將之旗鼓尸我一方賜諸侯之土田保茲東
夏以董齊於軍旅以撫和於士民參帝傳之寵名益戶
封之真食兼隆異數獎勵茂勲於戲昔吉甫典兵萬邦
為憲申伯作邑四國于蕃宜悉意於壯猷庶俾忠於前
烈答揚祖宗之訓予冀為衆得人夾輔邦家之基爾尚

為時宣力

侍中制

舜用臯陶若股肱之承元首商洛傳說如舟楫之濟巨
川蓋一體之相成或兩求而莫值肆朕纘極寤寐雋良
果得異能屬之大任用揚孚號明論在廷某行蹈中和
學通今古從容應物有適用之材慷慨立朝多據經之
論比回翔於禁闥遂更踐於樞庭閱歲已深服勞惟舊
朕惟紀官之敝久廢於正名分職之殊固難於覈實為

司徒之定制俾位號之無虛乃眷宗工宜加異數東臺
管轄之任爰處於弼諧南宮喉舌之司仍躋於端右體
加隆之注意當益懋於壯猷於戲秉國之均天下之所
取正熙帝之載朕心之所仰成使萬物各遂其生而一
夫無失其所以輔予治往惟汝諧

門下侍郎制

朕於天下之事以稟承處決屬之中書審閱較正歸之
門下而使尚書推而行之此三省所以異任而相成故

長令僕射皆宰相之任而左右省侍郎所以貳之蓋謹
其名者固將循之以稽其實也必使位無虛加人無虛
受以修國家之務然後稱朕意焉某明允修潔學通今
古以風力之敏見於績用以志行之篤重於朝廷擢自
從臣預國機政多引大體沃于朕心維董正治官之初
介東臺管轄之寄歷選在列汝往惟允夫堅一心以在
王室康萬事以亮天功汝之任也其尚勉哉

門下侍郎尚書左右丞制

尚書萬事所出丞所以筦其要門下三省之首侍郎所以貳其長朕稽于古義以正官號故合是寵秩以命吾共政之臣非天下之材足以協朕之謀繫人之望者夫豈虛授某莊毅忠篤通於古今列於廟堂以義陪朕是用考擇以為選首使文昌左轄之任舉瑣闥叅議之效明六官紀綱上之所以齊下者無以撓四方奏列下之所以通上者無所壅以弼予一人而亮成庶績尚懋厥志無忘訓詞

給事中制

有事殿內之臣職在於平奏述詳命令駁其違者而正之覆其善者而行之至於決獄官人發驛遣使申冤滯察苛姦莫不總焉其任可謂煩且重矣朕董治正官之始思得其人以稱厥位以爾具官某忠篤強毅明於理體勞閱甚茂朕惟汝嘉列之東臺公議所屬惟精敏不懈可以統治要劇惟剛方不苟可以辨白是非爾尚慎于厥修朕方觀汝之效

左右常侍郎制

左右之臣以騎從乘輿職在獻納可謂親且重矣非器識操行屬乎朕心夫豈輕授某老於文學練達治體舊惟共政勤烈在時某直諒多聞篤於自守先帝遺朕調護有勞皆以耆名列于秘殿是用考諮於衆寵以茲任朕惟爾之試用已效必能秉誼不渝惟爾之博通古今必能補朕之闕往祇厥服豈煩訓辭

左右諫議大夫制

諫議大夫掌議論舊矣今列於從官實有言責事無大小皆得開陳當其可從則為之更命令易取舍固朕之所虛心而聽也朕方於天下之忠讜惟恐不聞則居是任者直已以事上夫何間哉某器識強敏明于今古俾職獻替僉曰汝宜夫能通上下之情而使朕立於無蔽之地治道之所繇出在汝能任其任可不勉歟

二起居制

孔子稱言動以禮天下歸仁焉矧託于王公之上言而

為令動而為法故必有左右史從而記之所以昭得失
明勸戒能稱茲任蓋難其人某文學優深操行修潔執
簡簪筆有列於朝今朕順于古義以考定官儀是用正
爾之名俾仍舊服其尚謹於書法以無曠于厥司

左右正言制

左右之臣以言為職事有得失關於理體利害繫於人
情或方兆於幾微或已施於命令論皆可及誼無不從
選用特殊寄屬惟重正官之始得士尤艱某綽有時材

通於世用獻替之位宜服寵名夫上之求乎下者患乎
難知下之求乎上者患乎難達使耳目之任無蔽藥石
之規必聞尚惟汝能以助予治

諫官制

某純明廣博信古知今用爾之長俾有言責夫言人之
所難言爾無不盡而聞之如恐不及朕豈敢忘其尚懋
哉無或容而已矣

中書令制

虞氏之咨四岳惟亮天功周家之建六官以為民極朕
叅于古義質以今宜以右省典正於鈞衡以中臺總持
於綱紀兼是重任時惟宗臣播告在廷其聽新命某敏
於學術優有時材以經遠之謀彌綸治具以察微之智
練達事幾繇展采於禁林遂陞華於宰路協宣勞力積
有歲時朕惟授職以量能宜循名而責實稽先王之作
則以正百官起多士之赴功庶康萬務眷言舊德申以
異恩維化原實繫於內樞俾首弼諧之任維政本一歸

於會府仍躋端揆之崇寵秩所加委成彌重豈獨儀刑於列位固將叙正於彝倫於戲咸一德以格皇天輔予于治釐百工而熙庶績待汝有為其務迪於壯猷尚思齊於前哲體茲注意維往懋哉

門下中書侍郎尚書左右丞制

尚書中書門下三省本天下之務而侍中令僕射為宰相之任舊矣自唐政不綱而失其守今朕董正治官使三省之長皆復其任而於尚書左右丞左右省侍郎秩

有升降使貳吾任政之臣夫綱轄之地與御史更相察舉所以警官邪明憲度而侍郎於左右省無不統理則其所繫於體尤重非傑出之材不在茲選某官端方篤實學有本源預于政機人望惟允某強毅忠厚通于古今謀謨廟堂休有令聞是用命爾以為選首其尚體余所以處爾之重勿苟勿隨使百工庶尹皆知爾之不公于法罔敢不正而政令之自上出者罔不得宜以稱朕所以作則垂法始今行後之意爾可勉矣予有望焉

中書舍人制

朕稽于古以正百官使循其名以效其實惟舍人中書之屬以典掌命令為任而況列於侍從則又職在論思方朕明紀綱定憲度以為民極之初非能見於文章何以究宣朕意非能通於世用何以彌綸庶務進在茲位不其重歟某官某忠正仁篤達于古今其文足以代王言其智足以謀治體斷自朕意以為選首其尚尊爾之學以善於訓詞奮爾之庸以裨于政理使爾能稱厥職

而朕預於知人其惟勉哉以祇厥服

知制誥制

典掌書令之任為左右之臣非獨在於潤色斯文而已
固當論思治體以輔朕之不逮朕博考天下之材然後
有所拔用則於付授豈不慎哉某強識敏學通於理要
砥節勵仁忠篤不回朕惟汝嘉使在茲選朕有兢兢業
業一日二日萬幾之慮汝則思輔以謀猷忠於獻納朕
有作則垂憲施命以告四方之志汝則思達以文辭見

於號令使汝為稱任則朕為得士豈不休哉尚其勉矣
以服厥官

知制誥制二

贊為名命之臣法當得

一作侍

從非獨在於討論翰墨發

揮詔號而已必將講明治具思獻其可以弼予違故非
其人夫豈虛授某敏有時材優於學術擢於不次俾典
訓詞維能守其所聞可以輔予不逮維能明於體要可
以見於文章其尚懋哉方觀汝效

尚書左右丞制

本天下之政者尚書也本尚書之紀綱者左右丞也蓋
衆職之治亂萬事之廢舉糾而正之實其任焉今朕董
正治官使尚書續其舊服以僕射為任政之臣而六卿
各遵其職至於綱轄之地所以儆官邪繩謬戾御史有
不舉者得并而治之則其繫於體尤重是以進其位叙
使得貳吾任政之臣非望臨一時朕豈虛授某明允忠
篤通於古今列於廟堂以義陪朕是用考擇以為選首

其尚體予所以處爾之重勿苟勿隨俾百工庶尹知爾之
不私于法罔敢不正稱朕所以作則垂憲始今行後
之意爾可勉矣朕有望焉

左右司郎中制

尚書天下政本左右司紀綱之地故郎選異於諸曹非
器幹望實有聞於時莫稱其任某明敏強濟通於世用
宜在此位故以命汝創制之初舉墜興壞所以彌綸庶
務者待汝有為其尚懋哉以承厥叙

元豐類藁卷二十三

欽定四庫全書

元豐類藁卷二十四

宋 曾鞏 撰

制誥

吏部尚書制

尚書政本而吏部天官所以考擇人材以成天下之務
近世既失其職但受成事而已今朕既正官名且將歸
其屬任立法之始推行在人其於程能議功定勲頒爵

當率厥屬謹循科條非得周材曷稱茲位某忠厚仁篤秉義守正列於侍從休有令名是用選而授之其務將明使朕所以作則垂憲不獨於今可行方當施之後世蓋汝有稱職之美則朕有知人之明尚其懋哉無替厥服

吏部侍郎制

尚書本天下之務而吏部典掌選舉至於所屬之曹有行封爵議勲庸稽功課之事咸以咨焉近世以來職分於他司而位為虛器今朕董正治官使歸其名分者豈

虛為哉固將循之以求其實蓋明紀綱定制以釐百
工熙庶績此朕志也侍郎實貳其長非獨當修其官且
將推明新制以行今而傳後則其選授豈不重哉某文
學行義有聞於時列于從官獻納惟允是用命爾實首
茲選其體予所以擇而使爾之意務祇厥服使政舉法
行稱朕之意惟爾亦永有稱於後世可不勉歟

戶部尚書制

戶部之於中臺為周官司徒之職掌財賦之調度金穀

之出入以待邦國之用歷唐五代征斂煩興而使名雜
出地官之職蓋存虛號而已今朕正名以定羣臣之位
辨位以責庶務之實尚書政本典領經費之司所屬尤
重博求天下之士以宜其官某誠篤強敏智慮精密董
煩治劇材力有餘民曹上卿無以易汝理財之術待汝
有為今歲入甚廣而歲費所餘者無幾使官用有節而
餘蓄可致公藏贍足而民賦可輕在爾能知其方庶幾
承朕之志尚懋爾守以承厥叙

戶部侍郎制

田疇生齒之籍穀帛貨泉之計下以制民之產上以經國之用地官之貳實叅總焉朕方因能以用人正名以授職俾服予事必惟其材某頃以通敏之姿久更要劇之任往副民部孰如汝宜夫知農之艱難而有以勸助視財之豐匱而有以均節使公藏贍足而私蓄羨盈朕將觀爾之能爾其無懈於位

禮部尚書制

昔舜命伯夷典禮后夔典樂至周并為宗伯之官今禮部尚書蓋其任也威儀度數之詳聲音律呂之別莫不屬焉精微之至所以統和天人順遂萬物其體可謂大矣矧今典領實又考擇天下之材夫能無曠其官以充吾所以寄屬之意歷選在位今得其人某明允直清知經信道制作之事舊惟討論春官古卿是用授汝朕承百工之敝方欲作則垂憲以成一代之典使五禮之節同於天地八音之和格於祖考天下智謀材譔之士得

而用之恃汝能稱其官庶幾輔予予治無懈于位以副朕知

禮部侍郎制

夫禮之節文樂之和聲所以成三材而育萬物典掌之任秩亞春官朕方考正百工之名而大修法度之政其於寄屬必惟其人某材出士倫學通經術宗伯之貳爾往欽哉其思先王制作之方而務知治民易俗之要其於理體非在於鐘鼓玉帛而已尚稱厥職以副予作則

垂憲之心可

兵部尚書制

中臺政事所出兵部司馬之任所以典總師徒揚國威
武至於按圖辨地駕乘庫兵司存之事莫不咨焉今朕
考古以正官儀將使處其名者必効其實由是以推朕
之志明紀綱成法度焉八座之貴夫豈輕以屬人某明
達事幾好謀能斷列於侍從忠益居多夏官古卿是用
顯授朕患今之兵不與農合故因保伍之法修閱試之

令庶夫使民知兵近於古義夫究宣朕意使吏能奉承而民皆嚮勸以共武之服時汝稱職可不勉歟

兵部侍郎制

夫兵天下之備誰能去之自士不出於井地而將非六事之人歷世以來皆知古之宜法而患夫勢之難行朕獨慨然有志於是故修保伍之令明戰陣之教先王之跡庶或可幾經營之勤心亦至矣惟是夏卿之亞實參典領之司方正官儀尤慎推擇具材敏忠篤明習治體

圻父之貳往惟汝諧夫能獎誘務農之民悅趨講武之政馴致有漸而彌綸不踈惟無廢爾之勤可以輔朕之志尚思自勉以服訓詞

刑部尚書制

昔舜命臯陶曰汝作士明于五刑以弼五教蓋刑者所以助治而非致治之本也其縱入輕重得失之際人之舒慘繫焉此古之聖王所以未有不先慎罰也今朕悉心以正庶官之任而中臺八座典司邦禁選用之體得

人惟艱某明允通博資以術學服采于位厥聲顯聞秋
官古卿是用命汝蓋前世之治斲雕為樸破觚為圓而
憲網踈風俗美朕甚慕焉爾尚體朕之心折民以恕使
辨訟自息而王政寔明可不勉歟以輔台德

刑部侍郎制

刑者所以禁人為非而聖王之所尤慎中臺總領之任
秩貳秋官之崇朕方正名以稽羣吏之治而大修制度
之文必惟其人俾服予采某慈恕忠篤明習法令叅執

邦典莫如汝宜夫能使民無冤亦已善矣推之可以至
於使民無訟爾尚勉哉以承予綱紀四方之志

工部尚書制

昔舜咨于衆疇若予工羣臣薦垂往祇厥序蓋繕修興
造程衆藝飭五材國家之務不可以不屬之其人今中臺
起曹實踐其任矧屯田虞衡平水之職莫不隸焉正名
之初其選尤重某材力強敏周于畫計更閱內外時稱
汝能俾服冬官蔽自朕志夫詳明品式以訓匠建事使

費省於國力寬於人至於墾地山林溝洫之政莫不畢舉皆汝守也其尚懋哉以率厥屬

工部侍郎制

夫飭五材程匠事國家之務所不可已也故共工之事任屬非輕朕方若稽舊章財正官號思得智能之士以副采擇之詳某開達敏強明習典故冬官寵列俾介厥司考究制度之文紀綱修繕之政在爾能舉其職以稱吾經理萬事之心其尚懋哉往祇厥服

禮部制

朕正郡司之名而責其實歸天下之務而本之尚書故
郎選甚高維春官之屬禮樂所出宜得智謀材譖之士
以修厥官某業履望實見於世用考擇於衆莫如汝諧
其尚體予董正治官之意於夫創制之初明紀綱興曠廢
惟知其要乃能圖其詳惟悉心以祇厥服

主客制

朕甚重郎吏之選欲以斂羣材責功實典客之任列於

門曹維時右人宜服茲寵國家之有賞典所以待汝有為

膳部制

牲豆酒膳辨其儀數而修其政春官之屬郎秩甚寵詢
求材實爾允僉言尚思欽承以稱推擇

駕部制

輿馬輦乘之奉郵驛圉牧之治中臺要務主以郎曹敷
求得人俾任吾事夫駟之頌養馬之詩也蓋其大旨曰
思無邪然則為政之方斯可知矣能識於是夫何遠哉

庫部

甲盾弓矢之器乘輿鹵簿之式武藏之任郎選甚高得
士於朝屬任惟允夫稽功實以勸賞朕方必行悉忠力
於事為爾尚無懈

都官制

係累舛饒之人恤其廩給而申其訴競主以郎吏國之
舊章爾惟惠茲宜莅厥職尚思奮勵以稱敷求

比部制

內外經費之事總於句考之司郎實主之位重省闡爾
惟明敏宜能厥官惟時懋哉以服予訓

司門制

門關筦鍵之事啓閉出入之節總其籍賦而審其禁令
郎官之任爾允詢求尚敏勞能朕將考察

屯田制

率屯戍之兵服畝畝之事所以益邊省饋佐國裕民郎
於中臺總其政令用爾之敏宜能厥官往服寵名無忘

奮勵

虞部制

蒐田有時而澤梁有禁虞衡之守所以遂羣生而參化育中臺典領咸屬汝材其思順鳥獸草木之宜以稱朕愛人及物之意

水部制

川瀆隄防宣其利而備其害四方萬里之遠郎實總領秩甚寵焉爾以周材朕用選授夫知水之不以障而導

之使行此成法也推而見之於事待爾能稱其官

御史中丞制

御史府持吾邦法所以糾官邪繩不恪輔予于治非秉
義純篤望實敷於上下不稱其任某強毅肅哲以裨其
身博學精識通于世用是以考擇于衆寵以茲位夫有
守正向公之志又有能辨是非之明抗論於朝使賢不
肖忠邪不失其實此法之所以為治具而能佐吾以善
養人之意使汝能宜其官則朕為得其所屬尚體予訓

其惟懋哉

知制誥授中司制

典掌明命總持憲綱非博學有文強毅忠篤曷可以兼
斯任哉某志行清夷材資敏達更踐內外試用惟允論
思禁掖肅正朝端蔽自朕知拔于不次惟明於體要可
以見於訓辭惟公於是非可以施於刺督尚懋厥守方
觀爾能

中司授太中大夫制

朕正名以定百官之位辨位以責要務之實矧風憲之
臣紀綱所屬曷可以不明其任哉某強敏開遠行誼仁
篤學通古今擢典訓辭遂持邦法宜專分職以應新書
是用進爾之階品在第四俾爾納忠宣力得壹意於中
司以董齊衆工肅正內外庶余之作則更制罔或不虔
在爾懋哉知其所守

責御史制

中執法所以糾官邪繩不恪也其可以自為欺且怠歟

某拔於疏遠之中服在此位宜殫忠力以稱所蒙而按
劾大臣既非其實稽其分職則自餒焉朕為之優容俾
從薄責而進對之際公肆誕謾屬吏推窮獄辭明具論
其情則懷詐比其治則瘼官夫身任紀綱之司而抵冒
若此雖朕欲貸汝而如公議何斥守偏州尚仍階品往
新厥志庶蓋前愆

御史遷郎官制

御史董攝紀綱肅正朝廷於政之有不當于理於臣之

有不協于極皆得言之故吾甚重其選爾有列于此能勤厥職雖歲月未久而風望甚高今有司奏爾之課於法當遷吾不得留易之卽位使爾知自効能不擇官則吾於報功亦有異賞爾其勉矣無忘訓言

御史知雜制

臺無大夫中丞則御史之首當專決庶務實總邦憲朕選於衆然後屬之其人豈不重哉某敏茂直清通於學問輟自右史往踐厥司夫振舉紀綱以闡明法度糾繩

邪慝以肅正臣工朕方虛心志在於與人為善爾能苦
口無患於不得其言其尚自強以允公論

監察御史制

御史持國紀綱所以糾官邪齊內外邇衆而授厥惟艱
哉爾好古知方強於自立刺察之任往其欽哉惟不回
于爾心以無撓于余法在知所守可不勉歟

元豐類藁卷二十四

欽定四庫全書

元豐類藁卷二十五

宋 曾鞏 撰

制誥

祕書監制

帝王之治必有圖籍之藏又擇當世聰明拔出之士聚
於其間使得漸磨文學之益獎成其材以待國家之用
故書省之設吾不計近功而要於廣畜德所以厚其禮

秩而艱於用人庶以明朕好古樂善之勤而勵學士大夫之行也某多識博聞操守純篤諸儒所尚令問惟舊延處茲位蔽自朕知夫尊其所聞而行之不倦使輔於世教而其效可言非獨優游冊府而已在爾自強以承朕志

著作郎制

麟臺著作之任郎以詞學為之必惟其人爾以材選惟能明於理要乃可見於文章其尚敏於厥修朕方觀汝

之效

秘書郎制

秘藏四部之圖藉郎所守也職清秩美必也屬之其人
爾以材稱俾服茲選尚惟敏於畜德朕方觀汝之能

正字制

是正文字之官實為儒學之選宜體育材之意勉思畜
德之勤

殿中監制

分職殿內叅侍左右監總六尚之官以供服御之事位視九列禮秩甚優正名之初考擇惟慎某明習吏治勞閱有聞選於在廷俾踐厥任往其祇飭無忘訓詞

殿中丞制

丞於殿內叅總六尚之官而察其得失出於公選首以材升尚務欽承方觀汝效

太常丞制

丞於奉常叅總禮樂之事祠祀之義惟學古知方乃能

不失其守尚務祗飭以服官箴

衛尉卿制

典領宿衛之官地親責重位在九列禮秩甚隆考擇其人屬任惟慎某忠篤謹信濟以材敏周廬屯候之士武庫弓鎧之器往顓總治僉曰汝諧其尚懋哉以祗朕命

太僕卿制

書曰僕臣正厥后克正蓋親近左右有輔導之義矧車府廐馬牧監之政莫不咨焉非得其人曷稱厥位某材

質敏明久更器使司馭之選汝惟克諧其祗厥官以服朕命

大理卿制

折獄詳刑之事朕所重也典領之官位在九列正名之始選用非輕某明習吏治通於法令廷尉之任命曰汝諧往其欽哉以率厥屬

國子祭酒司業制

學校之法雖使之通經術治文字然要其大致則在於

明上之教以導民養人之材以成俗故師氏之位必惟其能某質性粹冲術業通博訓誨之任宜正寵名夫行其所知以先游學之士使風化之出自京師始待爾稱職可不懋哉

太學博士制

博士以文學為官往者列於成均其秩未正朕登之朝序所以尊庠序之教而勵士大夫也爾以經行選用往服厥官蓋尊其所聞以誘率學者汝之守也惟是懋哉

少府監制

百工伎巧之事展采備物之政典領之任位視列卿正
名之初考擇惟慎其明習吏治勞閱有聞遜於僉言俾
踐厥職尚其祇飭以服訓詞

軍器監制

繕治戎械訓工程作之任置監典領禮秩甚隆正名之
初考擇惟慎其明習吏事勞閱有聞遜於任廷俾踐厥
位尚其祇飭以服訓詞

大宗正丞制

司宗之於國族門內之治也然合遠近之屬而齊之有
不得專於愛者其於斟酌緩急恩義之際信難處哉故
其屬有丞以參聽其事而交修其官考擇爾能俾在茲
選夫親九族以刑萬邦此有國之先務也其體朕心往
從而長服茲是訓以欽厥司

諸丞制

丞於有司參其政事而察其稽失以材選用尚懋爾勤

知開封府制

開封府朕建國焉天下所並湊衆大而俗雜尹正之寄
非仁篤公勇材任煩劇不能稱其職令朕修定官儀正
其名號固將考求其實使效見於事則用人之際豈輕
也哉某莢邁開達練習治體閱試惟舊功用顯白處以
茲任莫如汝諧夫慈惠足以煦養懦弱剛嚴足以帖伏
奸強然薰民之方尚有可識使四方有以觀則而朕有
以仰成在汝勉哉以稱朕命

開府儀同三司制

開府之於榮名重矣矧優其禮命視于三事故其品為
第一所以隆崇大臣古今之通制也朕順于舊典考正
官儀惟是首於文階是用制其祿入秩莫厚焉非時宗
工夫豈虛授某材資傑異識慮閎深莊重足以鎮浮精
明足以成務熙帝之載有贊元經體之庸提將之符有
折衝綏遠之效令百揆攸叙方內靖嘉時乃之功助朕
致此是用峻其名秩申此寵章夫褒有功顯有德朕於

尊獎近輔之心可謂至矣親百姓撫四夷爾於將順朕志之義可不懋哉尚體至懷往承厥叙

開封府獄空轉官制

京師天下之聚俗雜五方之民至於智或侵愚強或凌弱巧偽滋出獄訟繁興統理之難為日已久某明敏開達曉習吏事輟自禁近屬之尹正以公於奉上之志絕阿以附下之私摘發姦欺動而必中彈治豪右勇於敢為使縲紲無非罪之嗟囹圄有空虛之效求之近歲罕

能及此聞于朕聽時惟汝加夫賞所以褒善而勸衆也
進官一等疇爾之庸其尚懋哉以永來譽

樞密遷官加殿學士知州制

典國樞要之臣協相帷幄之謀彌綸疆域之事夙夜不
懈風力施於省決精明用於思慮蓋勤且煩如是而歷
時且久豈朕優禮耆舊之意歟某忠嘉惠和德操惟劭
先帝所遺以輔朕躬當國本兵庶言惟允而屢辭幾政每
請彌確志不可易朕所重違是用改進文階延升祕殿

乃眷東夏處以近藩衍食真封併加寵數朕於隆崇近輔時其勞逸使得自擇出入之宜可以為有恩矣爾於迺心王室罔以內外無忘益勵始終之節其可以不勉哉

侍讀制

蓋用儒學之臣入閣侍讀所以考質疑義非專誦習而已其列於分職始自開元而朕尤意嚮之某博通今古服在從官茲選甚高屬爾惟允朕以未聞於史者究觀前世之變而至夫理亂興壞之際未嘗不反復焉其悉

所知以輔朕志是為爾守其往欽哉

殿前都指揮使制

朕擇材勇之士備宮屯之兵以宿衛京師鎮撫方夏置
帥殿陛屬之董齊非強毅忠勞閱試惟舊不在茲選豈
非重歟某篤實沉雄明於策慮護邊制敵身有顯庸茲
用命爾就列大廷典綏王族建旌立纛為國藩翰爰田
真食並錫寵恩夫兵有擊刺射馭之能有坐作進退之
法教習可以程其技節制可以閑其侮然能使之合心

一力則在知所以附之能使之取威決勝則在知所以用之審如是焉厥惟難矣蓋熟之於易所以圖其難得之於素所以應其變非造形而後定計非合戰而後屈人故師飽於逸而朝廷尊馬肥於休而邊隅靖惟予之武以無敵於四方則爾之良亦有聞於來世往遵辭訓以服厥官

使相制

在昔大雅所歌成周之盛呂侯申伯並為國藩休父太

師實將王旅出入踐更之雖異中外屏毗而則均時予
宗臣分保近服蓋循斯義以告在廷某精慮造微麴材
絕衆崇論閎議富于文辭強識博聞飽於術學繇禁林
之獻納任廊廟之弼諧浸更歲時休有功烈而屢形懇
請願避煩幾雖敦譬之甚勤顧壯懷之難奪是用錫之
土宇寵以節旄視宰路之等威益爰田之恩數往釐東
夏外倡庶邦予有式羣辟之典彛爾其底迪予有覃四
方之德澤爾其布宣以夾輔於本朝以阜康於生齒配

於前哲屬在老成其代天工矧久聞於大政迺心王室
尚思告於嘉猷

節度使制

有地千里治兵與民內衛京師外撫疆場非文武器幹
望臨一時朕所寵嘉不在茲邈某溫良能斷沉靜善謀
直道著於當官周材見於經務承流宣化善政有聞綏
遠折衝壯猷彌顯是用錫之土宇授以節旄生齒實繁
屬爾以安輯師屯甚衆諄爾以訓齊以作朕股肱之良以

為國藩輔之重無忘忠烈庶訖外庸惟亮天功待汝守
四方之效無輕民事副予安百姓之心尚體眷懷豈煩
多訓

節度加宣徽制

維昔牧伯長師之官有土與民共于外服所以為國藩
輔今方鎮之任連數十城之地籍兵與衆而授之建旄
立纛殿于大邦以作衛王室亦惟用稽于古非文武之
特才擅一時孰能稱茲選哉厥有顯庸宜加寵命迺揚

孚號以告庶位某莊毅足以任重肅哲足以裨身有能
斷大事之明有克勤小物之慎考于僉議付以成師宣
化承流實裨治體折衝綏遠克暢武經故能紓朕之憂
副人之望夫德茂者其賞異功隆者其報殊是疇其底
績之勤錫以宣猷之號揆于常典非朕爾私蓋位重者
其憂深祿富者其責厚名數禮秩朕既無忘爾勞功實
事為爾尚協朕之志矧夫填臨塞路總領兵防班籍聯
于輔臣謀畫參于國論其思勉勵以副眷懷

軍師制

爪牙之臣典領周衛非特強主威以鎮內外也蓋禮彌盛者備彌飭上下之節然也則任吾事者豈可以非其人哉某沉勇忠實勞閱有聞蔽自朕心俾供厥服仍遷位等其尚叙承

將軍制

朕有連營列校之衆以宿衛京師鎮撫諸夏能使士齊而奮其惟統督之臣求之在廷其選甚重某忠勇仁厚

將以智謀使治吾軍必能副朕所屬今閱士之藝朕皆親臨拔其異能而汰其疲軟其於撫循訓勵之方可謂至矣爾於典領惟公賞罰可以服其心惟篤恩信可以致其力使處則有以養朕之威出則有以揚朕之武待爾任職稱朕意焉

都虞候制

士之以材武宿衛左右者其選甚精而虞度候視於軍中者其任甚寵某忠勇有勞宜在此位進遷使號其往

欽承

都知制

門闥房闥之間朝夕給事非謹信忠篤烏可處斯任哉
某服勞左右閱歲已深淑慎厥躬朕所考察俾率厥屬
往惟汝宜其思永於厥修尚終綏于榮祿

內臣制

給事長秋服勤惟舊今其老矣思就便安錄爾之勞宜
進位等尚思祇服以稱朕恩

責帥制

朕拊士於閒暇之時蓋將責其效也至於臨敵逋亡朕雖假之以恩而將帥之臣則當濟之以肅使紀律章明然後威可勵而士可用也爾握兵之要宜知其職而潰卒之入煦煦受之勞問餉給如勞歸師使夫三軍之衆將何視焉有苟簡姑息之心無守正奉公之誼聞外之事朕孰賴哉議罪正刑有國之典奪其近職處以偏州尚自省循茲為薄責

監司制

分部而使連數十城事之與奪吏之黜陟係焉古方伯之任也其選甚重固無假人爾修潔純明治行強敏刺督之寄往共厥服夫能使政舉刑清和樂交於上下人足家給富饒洽於公私皆汝守也可不念哉

廣西轉運制

自既開百粵而地盡南海提封萬里莫不內屬本朝之制始分桂林以為西部非獨鎮撫吾民亦以綏馭山居

谷聚並海之蠻夷故將命而使其選常重爾嘗試而可
居是用任屬惟柔遠則能邇其務宣布上恩輯寧異土
無失朕指往欽厥司

蜀轉運判官制

西南之地延袤萬餘里外臨殊俗內雜谿谷諸蠻列州
成縣以保安吾民境大人衆故屬部為四而利居其一
最遠且險參於使事其選甚高求於在廷是用屬爾夫
保民以仁而懷遠以德茲朕所嚮其往欽哉

轉運使制

國家歲漕東南之粟以實京師故命使部之臣推擇能吏使度材具舟以濟其役爾應其選歲課甚優是用遷秩京司以為爾寵朕於臣下之勤勞雖微且遠無所遺矣則爾之自効可不勉哉

陝西轉運使制

分部而使兼地數千里治兵與民與夫征賦之出入自陝以右則又與疆場之事具於寄屬必惟其人察于在

廷無以易爾夫使督課明而政事舉經畫當而財用足吏與士皆悅而勸兵與民皆瞻而靖爾之任也其尚起哉


提舉常平制一

朕憫農之不易故擇材諳之臣分部四出以平其政令而佐其衣食之業爾以能聞當是任屬其務知朕之意在於惠民往慎厥司慰彼黎庶

提舉常平制二

朕憫夫農之艱且勤故詳為勸助之政又擇能吏分部

四出使推而行之爾以材聞預在茲選其思宣布朕恩
使敦本業之民安其田里而足於衣食則爾為能稱其
職可不勉哉



元豐類藁卷二十五

欽定四庫全書

集部

元豐類藁卷二十八

六至

詳校官庶吉士_臣張溥

檢討_臣何思鈞覆勘

總校官降調編修_臣倉聖脉

校對官中書_臣陸湘

謄錄監生_臣王志遠

欽定四庫全書

元豐類藁卷二十六

宋曾鞏撰

制誥

知州制

昔先王之法道民以德齊之以禮而有恥且格後世不
及然破觚以為圜斲雕以為樸禁罔踈闊而吏治蒸蒸
不至於姦猶為近古朕甚慕之今能與吾共成此理者

其唯循良之吏乎以爾為能與在茲選使刑罰清而風俗美爾能善於其職則明考察而公賞勸朕豈貳於必行其尚自強方觀爾効

知河陽制

盟津冀豫之域背河向洛成臯之間天下之重地也山川之固為國屏翰分土而治非文武之特曷可以當選授哉某以材進拔閱試已孚俾仍近班往祇厥服有生齒之衆屬爾撫和有連營之師待爾綏輯尚茂循良之

效庶寬西顧之憂

知軍制

開建城壁本以輯治軍旅今四方既平而假守之臣實任民事列於有土之官矧湖北並邊寄屬尤慎爾以選擇往祇朕命夫能宣布恩威以拊循吾人而懷附異俗則為善於其職尚思爾守無替訓辭

通判制

州有治中以攸助其長綱紀衆務舊矣今列城之守皆

有貳焉蓋亦其任也爾以考擇往祇厥叙尚思稱職以報朕恩

罷館職加官制

夫為官擇人處其名者必任其事而儒館之設有位號而無分職使學士大夫將何以效其實歟是用命爾進階一等而罷其虛稱其有異能朕將明試以功庶爾之材得施於用以成朕招俊乂康庶位之意焉其尚懋哉

賞功制一

王師西封爾能奮力行陣斬獻首馘稽諸賞典宣進官
榮爾尚勉哉益圖來効

賞功制二

擐甲執兵人之重任賞信而速所以勸功爾爰整我師
徂征西土大殲醜類來獻厥俘圖爾之勞進階一等尚
思奮勵以佇異恩

團練使駙馬都尉制

大長公主吾姑也位號禮服褒崇光大國有彝章蓋其

下嫁必得勲閥之門良能之士然後可以成先帝愛育之仁而稱朕隆崇之誼某貴舊家子內外行完是用選見於廷命之進尚團兵重任倖馬美名兼而授之蓋稽故事夫恭儉靖慎可以保令聞而綏寵祿茲惟朕訓汝尚勉哉

磨勘轉官制一

吏之在位者積歲月之勤應有司之格必有甄進以明勸獎此國家之典也今序爾之勞遷位一等往思祇服

以稱朕恩

磨勘轉官制二

朕謹名分正官守以董齊百工至具有試用之勞無踐履之玷則皆稽其歲月法有甄進所以使吾勤事之吏知所勸也今有司比爾之課應於遷格宜升階品以允新書其朕恩往思來効

軍功制一

惟羌捻惡世盜西疆理將殄除內自生變致天之伐非

朕敢私爾躬提偏師摧陷醜類震動河外宣明國威破竹之功成在旦夕賞不逾月朕尚遲之用遷爾官以勵衆士能殲大憝當有異恩

軍功制二

河外之地我之舊服羌能靖綏則以畀之今其將亡自相戕害爰命討伐蓋將天威某沉勇有謀提兵以出獻俘斬馘屢奏厥功擢進使名以昭信賞能殲首惡尚有異恩

軍功制三

朕惟羌之猖狂內相賊殺致天之伐爰命六師止除罪人復吾故地而已爾握兵而出屢以捷聞蓋夫軍賞之行速則衆勸是用進爾之秩以激士心尚有不次之恩以待凱還之喜

新及第授官制

朕立學以養天下之材設科以進其造秀之士其於教導推擇欲成美俗於四方得羣能於庶位者可謂盡其

意矣爾以經行文學選自朕躬命以一官將觀汝效往
祇厥叙思稱朕恩

責將制

汝始以微功進朕不次用汝而屬之守邊乃冒吾法出
蠻夷之中發人採金無出入之籍有侵盜之刑朕惟不
欲數使遠人煩於追逮繫獄也寧失汝罪不究窮之

堂後官轉官制

吾調兵于外而號令節制之繇中出者汝以宰屬與於

治文書赴期會能辦吾事進秩一等以獎爾勞尚思恪
勤無墜厥守

詔

勸學詔

朕惟先王興庠序以風四方所以使學士大夫明其心
也夫心無蔽故施之於己則身治而家齊推之於人則
官修而政舉其流及遠則化民成俗常必繇之古之所
以長人材厚人倫者本是而已朕甚慕之故設學校重

學官之選而厚其祿凡欲以誘誨學者庶幾于古也而在位者無任職之心承業者無慕善之志至於師生相冒挾賂為姦囂訟囂然駭于衆聽而況欲倡率訓導洽于禮義磨礱陶冶積於人心使方聞修潔之士克於朝廷孝悌忠篤之風行於鄉邑其可得乎朕甚憫焉故更制博士而講求所以訓勵之方定著於令以為學制予樂育天下之材而庶幾先王之治者可謂至矣自今有敦行誼謹名節肅政教出入無悖明于經術者有司其

以次升之使聞于朕將考擇而用之以勸于爾衆士有
偷懦怠惰不循于教學不通明者博士吾所屬也其申
之以誘導使其能有易於志而卒歸於善固吾之所受
也予既明立學之教具為科條其於學者有獎進退黜
之格以昭勸戒至於學官其能明於教率而詳於考察
有得人之稱則得以信賞若訓於無方而取舍失實亦
將論其罰焉明以告爾朕言不欺尚其懋哉無詒爾悔

勸農詔

夫農衣食之所由出也生民之業莫重焉一夫之力所耕百畝養生送死與夫出賦稅給公上者皆取具焉不幸水旱螟螣之菑往往而有可謂勞且艱矣從政者知其如此故不違其時不奪其力以使之明時之因析以授之差地之腴瘠以處之春省耕秋省斂以助之詩曰饁彼南畝田畯至喜言上所以勞之也又曰駿發爾私終三十里言上所以勸之也其獎勵成就之者如此朕自承天序內重司農之官外遣勸農之使為之弛力役

均地征修水利或一雨愆期則憂見於色或一穀不成則為加惻怛有復除之科有賑恤之令夙夜孜孜勞心焦思者凡以為農也今耕者衆矣而尚有未勉墾田廣矣而尚有未闢豈拊循勸率有所未備歟抑吏怠而忽不能宣究歟有司其於農桑之務益思所以除害興利詔令已具者無或雍闕所未盡者勿憚以聞要使緣南畝之民舉忻忻然樂職安業洽於富足稱朕意焉

正長各舉屬官誥

蓋聞堯之治曰百姓昭明舜之治曰四門穆穆然則當是之時在位皆君子其是非不惑可知也故堯欲釐百工舜欲熙帝載求可任者皆訪諸四岳因四岳以命禹又因禹以命稷契皋陶因羣臣之讓兪曰以命垂益伯夷因伯夷以命夔龍其審官用賢不自任其聰明而稽之於衆如此然存於書二帝所命者羲和九官十二牧皆官之正長也至於屬官則未有二帝嘗命之者其遺法之可考則周穆王命伯景為太僕正戒之曰慎簡乃

僚無以巧言令色便僻側媚其惟吉士則自擇其官之
屬者官之正長之事此先王之成法也漢魏以來公府
郡國亦皆自辟其屬而唐陸贄請使臺省長官自擇僚
屬蓋上下之體相承如此以周天下之務此古今之通
理也今朕董正治官始自三省至于百工皆正其名夫
使在位皆君子而是非不惑此朕素所以勵士大夫也
故凡官之長貳朕既考擇而任之尚書政本也自郎已
下用吏甚衆其令僕射左右丞尚書侍郎各於其所部

員有未備皆舉二人以聞朕將擇而用之其未用者亦識其名以待用朕稽於古以正百官稽於衆以求天下之士其勤可謂至矣惟官之長貳之臣皆朕所屬以共成天下之治其尚體朕意所舉惟公以應朕之求所陳惟實以嚴朕之詔其得材失士有司其各以等差具為賞罰之格朕將舉而行之賞吾不恪罰亦無捨非獨搜揚幽滯庶幾為官得人亦將以觀吾大臣之能使朕得與衆士大夫合志同心以進天下之材作則垂法行之

於今以詒後世追于先王之成憲無令唐虞有周專美
於古不其美歟咨爾庶位其諭朕意一作懷

賜高麗詔

蓋聞在昔夏后分天下為五服地有遠近故治有詳略
而聲教之盛東漸于海朕甚慕之顧德不明何以逮此
而爾東國之君欽誠內附數遣使者乘不測之川獻其
方貢惟爾之義朕實寵嘉宜有異恩以稱勤恪而爾比
緣養痾以醫為請眷然東顧朕預憂之是用擇遣方技

之官具舟以往爾惠彼一方神明相祚藥劑所補以時
康寧達於予聞欣慶方屬而遽馳僚從來致謝章覽以
慰懷獎勸良厚爾乃自祖以來保乂彼土其尚願精神
強飲食格于眉壽以均福于有衆使爾有世濟其美之
功而朕預聲教及遠之休其始自今永孚于好

策

擬代廷試進士策問三首

策問一

朕有志於卑漢唐之治而欲比迹於唐虞三代之盛故
於書無所不學而通其意於天下之事無所不講而極
其本末於人之材長養成就之者甚厚求而用之者甚
至於民之務憂勤思念者甚詳撫而綏之者甚力患風
俗之敝也正己以先百姓而明於教示患政理之陋也
稽古以定制度而謹於持循欲斥大疆土勞於經武欲
懷附夷狄也廣於推恩人之所欲者不敢違人之所惡
者不敢強賞不敢以喜而濫刑不敢以怒而淫羣臣之

進對者夕請而朝見之四方之奏事者旦入而暮報之
未嘗有聲色之娛未嘗有畋遊之好不營宮室不崇苑
囿衣服飲食取具而已兢兢業業不敢暇逸日慎一日
十有六年于茲矣惟先聖王之烈雖自視欲然察其用
心如朕者亦可以無憾矣然古之大有為之君必有大
效於天下至於小能小善亦各有小補焉奚獨至於朕
也意彌篤而功未見於人行彌勵而德未見於世豈所
謂是者非歟所謂能者否歟抑所行者為可止歟所舍

者為可用歟將在位者奉承法令苟為空文而不務究
宣朕意歟意者今去古遠先王之政不可以復歟凡朕
之所為繇前者其失安在宜於今者先後施設其要如
何唐虞三代之所以成功德者孰近於今可推而行之
漢唐之卑者孰存於今可革而去之其悉心以對朕將
自擇

策問二

夫有二南之化則有羔羊之大夫兔置之士廣漢之女

其成人之材則見於思齊其成物之性則見於行葦蓋王者之治繇近及遠其效如此何其風俗美而流澤深也今朕躬禮義以先天下恐其未諭也崇庠序以道之

縻

一作靡

爵賞以勸之患其未從也以政率之以威董之

可謂盡心矣然朝廷之臣未能有素絲之節正直之行中林之士未能有慎獨之心女子之誼未能有翹翹之節況於有德有造成人之材牛羊勿踐遂物之性可望其髣髴乎朕於士民億精刻一作克意以待其善而天下

靡靡便文苟偷而已何其習之難變也夫先王之教其
本豈易於身先之其具豈易於崇庠序靡爵賞修政
刑以將之與今之所務者同也然以今方古違從之效異
何也豈今之所知者不明所尚者不審歟抑人散久矣
不可以復化歟子大夫待問于廷其以經對

策問三

朕獲承祖考懼德不明故小大之事躬親省決以夜繼
日不敢自暇而政未加善側身踐行兢兢業業不敢自

逸為天下先而俗未加厚崇庠序之化信賞罰之法以
開導而士未加勵憫農惠商補其乏闕除其疾苦以勸
助而民未加富礪器械教士卒所以經營之者甚具而
武事未立也定制度正官號所以彌綸之者至備而文
治未洽也至於百工未昭彝倫未叙四民未盡得其職
萬物未盡遂其性中國之勢或詘於夷狄九州之地未
一於舊服是皆疾於古豈朕之不敏所知者非其要所
繇者失其統歟抑羣臣之在事者不稱其任不能輔佐

歟將乖繆之習久更革損益之始其功難見歟朕之待
物者未嘗不以誠而下之應上者皆文具而已是何故
也意朕之所為與古之所以致治者無異而其效之不
同何也二帝三王秦漢以來迄於唐及五代雖功德有
間然其所以治且昌與夫所以衰亂失之者其跡可考
其原必有在方其治且昌也所繇之路先後本末其一
致歟抑有殊也其衰亂失之也浸漸積累所以致之一
揆而已邪抑不然也知古今明治亂子大夫之職也其

具著於篇朕將親覽

元豐類藁卷二十六